

# L'exposiziun da trais dimensiuns cuntinuescha

**La Società Stamparia Strada ha ramassà 15 000 francs per la fundaziun. Las attracziuns da l'on passà sun stattas la festa da giubileum e l'exposiziun speciala da trais dimensiuns. Quella resta averta amo üna stagiun.**

NICOLO BASS

L'exposiziun speciala da trais dimensiuns i'l Museum Stamparia Strada es statta ün grond success. Quai conferma il president da la Società Stamparia Strada in occasiun da la radunanza generala in sonda a Strada. «Cur cha l'exposiziun es statta averta, sun eir rivadas las medias e cun quellas blers giasts ed amis», ha'l quintà in seis rapport da gestiun. Dürant il temp d'avertüra dal museum d'eiran ils squitschaders dà 3D adüna in funcziun. Ils visitaduors dal museum a Strada han gnü la pussibilità d'observer üna figüra chi gniva scannada ed in seguit prodotta d'ün stampatur da 3D. Cha l'attracziun saja però stat il squitschader da tschiculatta. «La producciun da tschiculatta as pudaiva admirar i'l museum e plü tard as pudaiva degustar la tschiculatta i'l restaurant Liun», ha quintà Häfner.

Sper las uras d'avertüra normalas ha sport il museum desch davomezdis sco lavoratoris da 3D. «Bers giasts ed indigens han visità quists lavorato-

ris», ha dit il president da la fundaziun e da la società. Ün'attracziun implü es statta la festa da giubileum da 30 ons fundaziun e 20 ons società, chi ha gnü lö la fin da lügl insembel culla finischun dal lavoratori dals Fränzlis da Tschlin.

## Ramassar raps pella fundaziun

Dürant l'on scuors ha ramassà la Società Stamparia Strada raduond 15 000 francs per la fundaziun. Sco cha Georg Häfner ha orientà in radunanza, saja il böt principal da la società impustüt da ramassar raps pella fundaziun. In tuot ha la società gnü entradas da 16 600 francs.

Il rendaquint 2018 serra cun üna pitschna perdita da raduond 270 francs. Il chapital agen da la società importà 10 200 francs. Ils s-chars 30 preschaints a la radunanza generala da la Società Stamparia Strada han acceptà il rendaquint ed han dat dis-charg al president ed a la suprananza. Tuot las tractandas sun gnüdas acceptadas unanimamaing.

## Cumanzamaint da la stagiun

Cul di da la radunanza cumainza la stagiun nouva e las portas dal museum sun darcheu idas avertaſ. Cul di d'avetüra cuntinuescha eir l'istorgia da success da l'exposiziun speciala da trais dimensiuns. Quist'exposiziun vain nempe prolungada per üna stagiun. «Intant vaina decis da realisar pel 2020 üna nouv'exposiziun», ha infuormà il president Georg Häfner. Details o almain il nom da la

prosm'exposiziun speciala nu vöglian ils respunsabels amo tradir. Dürant il prossem on vöglian ils respunsabels eir realisar ün nouv prospect ed adattar la pagina d'internet. Implü dess gnir adattada l'entrada dal museum a

Strada uschè cha'ls visitaduors chatan plü bain las singulas sportas. Ch'ün proget plü grond saja, tenor il president Georg Häfner, da realisar ün audio-guide chi maina als visitaduors tras il museum. Per finir ha fat

referenza eir il president dals Museums Grischuns Andreas Leisinger da Tavo als commembers da la Società Stamparia Strada ed el ha ingrazchè per tuot la lavur voluntaria chi vain prestada.



**Thedi Gut da la fundaziun (a schnestra) e Georg Häfner president da la fundaziun e da la Società Stamparia Strada han preschantà il program da l'on.**

fotografia: Nicolo Bass